

## **Perbelanjaan tinggi untuk HSR tidak efisien - PM**

**Astro Awani**

**30 Mei 2018**

**Siti Nursyazwani**

Putrajaya: Perdana Menteri Tun Dr Mahathir Mohamad menyifatkan perbelanjaan besar yang digunakan untuk projek Kereta Api Berkelajuan Tinggi (HSR) Kuala Lumpur-Singapura yang hanya menyediakan kira-kira 100,000 peluang pekerjaan, sebagai tidak efisien.

“Untuk membelanjakan antara RM60 bilion hingga RM100 bilion bagi projek tersebut yang dikatakan membuka ribuan peluang pekerjaan adalah tidak efisien.

“Kami masih lagi mengkajinya,” katanya ketika ditemui pemberita selepas Majlis Berbuka Bersama Perdana Menteri di sini pada Rabu.

Beliau berkata demikian ketika diminta untuk mengulas kenyataan bekas Perdana Menteri, Datuk Seri Najib Tun Razak menerusi platform Facebooknya yang berkata pembatalan projek HSR akan mengakibatkan negara kehilangan potensi kewujudan 110,000 peluang pekerjaan.

“Menerusi projek HSR juga, jumlah berkenaan juga menunjukkan peningkatan sehingga 442,000 peluang pekerjaan menjelang 2069,” tulisnya.

Pada pagi Rabu, Tun Mahathir telah mempengerusikan mesyuarat Kabinet yang kedua sejak Pakatan Harapan membentuk kerajaan.

Hasil daripada mesyuarat tersebut juga Jemaah Menteri bersetuju memutuskan projek kereta api berkelajuan tinggi (HSR) dibatalkan, tertakluk kepada perbincangan dengan kerajaan Singapura kerana ia membabitkan implikasi kewangan yang tinggi.

Kerajaan juga memutuskan untuk tidak meneruskan projek MRT laluan ketiga.

**2018Astro Awani Network Sdn. Bhd.**

**(535275-D) All Rights Reserved.**

Source: <http://www.astroawani.com/berita-malaysia/perbelanjaan-tinggi-untuk-hsr-tidak-efisien-pm-176902>